



Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit isertitanut akileraarutip inatsisartut inatsisaata allanngortinneqarnissaanik, ingerlatsiviit tamakkiisumik ilaannakumilluunniit akileraarutai 20%-imik appartinneqassammata 1. januar 2023-imiit.

(Inatsisartunut ilaasortaq Jens-Frederik Nielsen, Demokraatit)
(Siullermeerneqarnera)

Demokraatit Inatsisartuni ilaasortaataannut Jens-Frederik Nielsenimut siunnersuummut pingaaruteqartumut qujanaq.

Siullermik oqarusuppunga, tunngavilersuutit tamaasa isumaqataaffigakkit, siunnersuuteqartup saqqummiussai. Taakku saniatigut ukuninnga oqaaseqaatissaqarpunga.

Ingerlatsiviit akileraarutaat appariartuinnarsimapput EU-mi aamma OECD-mi 1996-imili, apparaluttuinnarlunilu¹. Tamannalu tunngaveqarsimassaaq, tunngaviunerpaarlu tassaavoq, nunat ilaannut aningaasarsiorfitsialaanera.

Tamanna aamma takuneqarsinnaavoq akileeraarutinit isertitat qanoq ingerlasimaneranni. Tassani Danmark assersuutaalluarsinnaavoq. 2013-imi Danmarkimi ingerlatsiviit akileraarutaat 25 procentimiit 22 procentimut apparneqarput.

2013-imi ingerlatsiviit akileraarutaannit isertitat 52 milliaartit koruunit missaannik naalagaaffiup karsianut isertinneqarsimapput, ingerlatsiviillu akileraarutaannit isertitat 2019-imi² 73 milliaartit koruunit missaannik isertitsissutaasimallutik. Allatut oqaatigalugu imaappoq, ingerlatsiviit akileraarutaannit isertitat qaffassimapput naak, akileraarutinit procenti apparneqaraluartoq.

Soormiuna maani nunatsinni taamaassinnaangitsoq?

Demokraatinut tamanna ersarilluinnarpoq. Ingerlatsiviit akileraarutaasa appartinnerisigut tamanna suliffinnik amerlanerusunik pilersitsissaaq, akissarsianik qaffasinnerusunik aammalu unammilleqatigiinneq annertunerulissalluni. Isumaqarpugut, erngerluta aallartittariaqartugut Naalakkersuisut utaqqeqaarnagit akileraarutinit- aamma akitsuutinit aaqqissuusseqqinnissaminnut utaqqisitsiinnaratik saqqummiinissaat.

Taamatut oqaaseqarluta siunnersuutip siulliup akuerineqarnissaa innersuussutigaarput Aningaasaqarnermut- aamma akileraartarnermullu ataatsimiititaliami suliareqqitassanngorlugu.

¹ <https://www.danskindustri.dk/arkiv/analyser/2021/6/dansk-selskabsskat-stadig-under-pres/>

² <https://www.danskindustri.dk/arkiv/analyser/2021/6/dansk-selskabsskat-stadig-under-pres/>